

李文忠公奏稿

李文忠公奏稿

卷之三十一目錄

籌辦春撫片

光緒四年二月十五日

籌濟豫賑摺

光緒四年二月十五日

津局晉賑收數摺

光緒四年二月十五日

大員捐賑片

光緒四年二月十五日

庫防糧運分別辦理摺

光緒四年二月二十八日

海防機局款難分撥摺

光緒四年三月十三日

海運霉變請恤船商摺

光緒四年四月初四日

葉源濬容增祥請照原保片

光緒四年四月初四日

薛福成辭參贊片

光緒四年四月初四日

查覆滹沱河工難辦摺

光緒四年四月初四日

張家口糧臺請餉摺

光緒四年四月初四日

蘆鹽請緩奏銷摺

光緒四年四月初四日

截漕輕齎剝價請扣留片

光緒四年四月二十日

抵撥閩省京餉請緩解片

光緒四年四月二十日

臺灣紳捐借撥濟賑摺

光緒四年五月十四日

丁日昌勸捐得力片

光緒四年五月十四日

臺灣道捐賑片

光緒四年五月十四日

林維源母請匾額片

光緒四年五月十四日

外國捐賑請嘉獎片

光緒四年五月十四日

洋米無庸購運摺

光緒四年五月十四日

朱其昂請卹摺

光緒四年五月十四日

京城平糶派員接辦片

光緒四年五月十四日

籌墊河間賑款片

光緒四年五月十四日

沈兆澐請祀鄉賢摺

光緒四年五月十四日

官輪運糧濟賑請獎摺

光緒四年五月二十九日

截漕收竣片

光緒四年五月二十九日

運雜捐賑片

光緒四年五月二十九日

建設候審所片

光緒四年五月二十九日

海防支應請銷摺

光緒四年五月二十九日

李文忠公奏稿卷三十一

全集一之三十一

桐城吳汝綸編錄

籌辦春撫片

光緒四年二月十五日

再直屬上年旱區較廣需賑甚繁經臣奏提司道庫及練餉制錢合銀共二十一萬兩派員購運奉糧另提濟庫地糧銀十萬兩練軍餉銀五萬兩濟用各庫已羅掘殆盡除封河以前運回之糧並提存銀兩分撥各屬糶撫暨津省粥廠需用外旋據各州縣以冬春雪雨太少民生困苦紛紛請撥接濟口食核計前籌銀糧不敷尙巨臣處此艱窘時地無可呼籲仍不得不竭力經營又商飭練餉局司道先其所急設法勻湊兵餉銀七萬兩以爲續購奉糧及口袋運腳之費豫飭辦糧委員趕於封河期內在奉天營口等處儘數采買一面咨調閩廠輪船三隻江南輪船一隻及津口鎮海

操江輪船二隻於開河後輓轡輸挽如咨調各船未能速至卽添雇夾板商船協運各屬應行糶撫糧數銀數已體察情形陸續撥定飭派紳董備船至津庶糧到卽可領回核實開辦尙有局存之糧先行擇要給領其撫銀亦飭及時撥給仍責成司道認真察酌督辦或查戶散放或以工代撫或借給籽種總期窮民得沾實惠時已春暖津省粥廠流民羣聚易生疾疫已陸續資遣回籍飭各該州縣妥爲撫綏分別接賑其有老弱無依者酌量留養現在春撫布置就緒各路練軍彈壓緝捕盜蹤斂跡地方大致安靜津河開凍已久洋艘海運絡繹而來直省豫三省賑糧均須迅速轉輸臣擬於二月二十三日起程山河路赴津料理一切理合附片具陳伏乞

聖鑒謹

奏

籌濟豫賑摺

光緒四年二月十五日

奏爲片行籌辦米石運赴河南濟賑所墊價腳議定由豫分年解還恭摺仰祈

聖鑒事竊臣接准部咨欽奉光緒四年正月二十一日

上諭直隸現存平糶餘米三萬石著李鴻章卽行派員運往河南俾資賑濟等因欽此遵查侍郎袁保恆年前經過保定向臣商借招商局平糶餘米三萬石運往道口請先籌墊米價運腳臣以商局平糶米石係局員朱其昂等借湊采買以平直晉市價而濟民食須交現銀乃可用米否則該局成本壓擱不能循環糶豫省若有現銀自可飭辦若令直省代墊恐無可辦未敢遽行允定而袁保恆抵豫後因賑需緊急卽與兼署河南撫臣李鶴年奏請借撥其時該局員年終結帳已將平糶餘米變價還欠更屬無可撥

濟正在躊躇間欽奉

諭飭卽行派員運往袁保恒等來函復再四敦迫事關鄰封災賑雖力難兼顧而義不容辭因思商局既無餘米直省辦理賑撫需用正繁約計采辦三萬石米價運腳其需銀十二萬兩本省實無可挪卽月有暫可通融之項一針一孔皆有緊要用款待發斷不能行借無還李鶴年等摺內謂所墊價腳由豫分年提還究分幾年於何項的款內提還當經專文咨詢妥商定議茲准李鶴年袁保恒覆稱豫省徵收釐捐一項每年約收八萬餘兩的確可靠應就此項分作三年提還以光緒五年爲始七年爲止每年解還銀四萬兩以昭誠信等因卽飭令津局司道無論何款暫行設法借墊實銀十二萬兩以爲三萬石米價及運往道口腳費之用津沽現已開凍商米絡繹來津由招商局道員朱其昂即日另行購

買乾潔米三萬石會同署江海關道丁壽昌妥速籌辦起運事宜
上年運米赴豫之江北民船尙在道口一帶袁保恆等擬卽派員
催放前來裝兌陸續開行山津添派委員會同來員押運前進至
道口交卸總期早達災區多救民命庶可仰副

宸廑至所墊價腳銀十二萬兩事竣覈實咨明豫省卽照李鶴年
等所議分作三年按期如數解還不得短欠除咨部知照外理合
恭摺覆陳伏乞

皇太后

皇上聖鑒訓示謹

奏

津局晉賑收數摺

光緒四年二月十五日

奏爲津局收過各省官紳商富捐助晉賑銀兩及米糧棉衣合銀數目恭摺奏報仰祈

聖鑒事竊照山西省上年旱災甚廣待賑孔殷經撫臣曾國荃奏准於直隸江蘇安徽湖北湖南福建廣東廣西四川浙江江西等省勸捐接濟並經戶部議覆請獎事宜統歸直隸奏咨報部仍仿照天津賑捐成案辦理等因臣卽奏派遇缺題奏按察使現署津海關道丁壽昌新授直隸按察使前津海關道黎兆棠等在津設局籌辦一面知照各省並派員分投勸捐茲據該司道等詳稱自開局之日起截至光緒四年正月月底止計收前山西撫臣鮑源深捐銀一千兩粵海關監督俊啟捐銀三千兩湖北提督李長樂統領忠義軍記名提督劉維楨捐銀五千兩翰林院編修吳大澂勸

捐銀五千兩湖北藩司潘蔚捐銀二千兩丁壽昌捐洋合銀六百九十五兩黎兆棠捐銀一萬兩通永道英良捐洋合銀七百二十二兩八錢九分安徽衛池太廣道劉傳祺捐銀二千兩前廣東南韶連道陸心源捐銀一千兩江西補用道胡光墉捐銀一萬五千兩浙江候補道宋其昂捐洋合銀一千三百九十兩湖北候補道朱其詔捐洋合銀六百九十五兩遇缺題奏道何維楷捐銀二千兩候補道王定安捐洋合銀一百三十九兩候選道唐廷樞徐潤各捐洋五百元候選道陳樹棠捐洋一千元又公勸紳商捐洋一千六十九元共合洋三千六十九元合銀二千一百六十兩五錢七分長蘆運同姚文枬捐銀一千兩江蘇解到捐銀三萬兩上海紳商捐銀三萬九千四百三十九兩九錢二分一釐兩淮解到捐銀一萬一千六百八兩七錢八分五釐浙江解到捐銀二萬兩

江西解到捐銀一千三百二十二兩湖北解到捐銀九千兩福建
臺灣道解到捐銀三千兩廣西解到捐銀一萬二千八百兩匯費
銀三百兩又津局勸捐銀三萬八千九百八十兩各處官紳勸諭
商富捐銀二萬一千八百三十一兩四錢二分以上共收實銀二
十四萬一千八十四兩五錢八分六釐又勸捐米糧合銀二千二
十九兩四錢一釐棉衣合銀四百五十兩統計捐銀二十四萬三
千五百六十三兩九錢八分七釐內粵海關監督俊啟捐銀三千
兩前已奏請獎敘又廣東龍潘氏等捐銀三千兩現經另片奏獎
均應開除其餘捐項俟查取捐生履歷按照津章分批造冊咨部
給獎所收銀糧棉衣或轉解晉省濟用或爲轉運賑糧及代發采
買糧價運費將來統歸山西彙總報銷至前由晉省寄到部頒空
白執照係歸援照津賑捐章案內填用現在晉捐已奏准推廣另

行仿照黔章開辦其前發空白執照應盡用按照天津賑捐成案核獎截記以清界限等情具詳前來臣覆核無異理合會同山西撫臣曾國荃恭摺具奏伏乞

皇太后

皇上聖鑒敕部查照謹

奏

大員捐賑片

光緒四年二月十五日

再津局收過各省捐助賑銀兩臣已另摺奏報查浙江捐款內
有浙江撫臣梅啟照捐銀一千兩運司靈杰捐銀一千兩甯紹台
道瑞璋捐銀二千兩又廣西捐款內有調任河南撫臣涂宗瀛捐
銀一千兩學臣歐陽保極捐銀五百兩新任撫臣楊重雅捐銀七
百兩臬司長庚捐銀三百兩連月摺聲敘銜名之文武大員及此
外未經開到銜名者均能首先倡率集成鉅款洵屬公忠體
國救災恤鄰深堪嘉尚除俟核明或奏請

敕部優敘或移獎子弟另行辦理外理合會同山西撫臣曾國荃
附片具陳伏乞

聖鑒謹

奏

庫防糧運分別辦理摺

光緒四年二月二十八日

奏為調赴庫倫換防察哈爾馬隊應需糧運餉乾遵

旨會辦分別辦理恭摺仰祈

聖鑒事竊臣等欽奉光緒四年二月初四日

寄諭那穆濟勒端多布奏察哈爾馬隊向無餉需定章月籌辦理

一摺據稱宣化練軍現擬分起撤回所有換防之察哈爾馬隊官

兵到防糧運以及餉精庫倫現無專餉無從辦運請飭察哈爾都

統籌辦等語從前宣化練軍糧餉係由直隸籌撥此次察哈爾馬

隊如由察哈爾籌給餉精深恐力有不及若照宣化練軍章程統

由直隸撥給或尙易籌著李鴻章穆圖善會商籌辦以期無誤軍

需等因欽此遵查宣化練軍七百名連夫役共九百三十八名出

防庫倫係由直隸練餉局撥給月餉即於正餉內勻提采購糧米

由張家口糧臺口北道辦運該糧臺每年添領部款銀一萬四千六百兩內除三千六百兩解交練餉局湊放該軍改練馬隊應加餉乾其餘一萬一千兩爲運解前項軍糧腳價之用今該軍撤回分防近邊多倫諾爾一帶仍應撥給原有月餉並應加餉乾僅可騰出每年運糧腳價銀一萬一千兩此外並無空騰直隸練軍餉項專指固本兵餉及蘆鹽復價江海關協款近來復價協款均解不足數且地方連年水旱節次提撥練餉以應賑撫急需又協濟熱河新練兵餉入少出多供支甚形竭蹶兵士懸釜待爨時有不給之虞今歲災荒尤重庫款羅掘一空饑黎待哺嗷嗷幾致無從措手實難再籌兼顧此次察哈爾調赴庫倫馬隊五百名連管帶官弁約共五百二十名每年約需軍糧價銀六千數百兩運腳銀五千數百兩其合一萬二千兩又該馬隊兵每名月需餉乾銀七

兩連管帶官弁約其月需餉乾銀四千餘兩軍興以來察哈爾官兵無論何處調撥卽由何處就近按照征防馬隊章程籌撥餉乾其原營坐餉每月僅銀一二兩不等須留以養贍家口不能勻提濟用現在駐防烏里雅蘇臺之察軍餉乾卽由烏城徑行開放已歷多年其應需糧米由張家口糧臺請領部款辦運茲察軍調防庫倫事同一律直隸與察哈爾皆無款可籌自應查照烏城章程仍由庫倫請款辦理惟查撤回庫防宣軍每年既有騰出運糧腳價銀一萬一千兩自可移作察軍糧價運費仍由口北道運宣軍馬隊應加餉乾照舊請領分別濟用責成該道購辦糧米運送庫防尙不敷銀約一千兩及繩袋等項價值歸入該糧臺辦運烏城兵糧項下核實支銷毋庸請其察軍月需餉乾銀四千餘兩擬請由戶部撥給庫倫辦事大臣委員領回於防所徑行開放以歸

簡便自來用兵者必兼理餉事乃是維繫軍心否則呼應難靈事
機恐致貽誤至察軍餉乾細數容臣穆圖善分咨戶部庫倫辦事
大臣查照或分季或半年委員預期赴部請領一次卽由該大臣
核定咨部辦理仍俟到防後將起支日期分咨備案前次庫防歲
請銀五萬餘兩自遣回古北口宣化練軍及裁撤雜差等項已減
去銀約四萬兩今月領銀四千餘兩較之原請之數所增無幾在
部庫易於添籌而餉有著落兵得實用庶於邊塞要防有裨臣等
往返咨商意見相同謹合詞恭摺陳伏乞

皇太后

皇上聖鑒訓示謹

奏

海防機局款難分撥摺

光緒四年三月十三日

奏爲北洋海防經費天津機器局專款難再分撥鄰賑京餉恭摺仰祈

聖鑒事竊臣欽奉光緒四年二月二十八三月初二初三等日

寄諭庶子黃體芳奏請將海防經費製造機器之釐稅酌留數萬其餘暫停一年以充京餉編修吳觀禮奏請將海防經費查明實存若干移作賑需給事中李宏謨奏請將各省協解輪船機器各局用款暫提十分之五分解晉豫辦賑是否可行著酌度妥籌等因欽此臣查黃體芳等所奏各節固爲移緩就急起見然通盤籌畫其勢有不能偏廢者海防經費原議各省關每年額撥銀四百萬兩南洋現無存款其解歸北洋者自光緒元年七月起至四年二月底止將屆三年所收之數遠不及一年額撥之數除陸續支

放海防本款銀八十萬餘兩去秋以來奉

旨撥給晉豫賑銀二十萬兩借給晉省賑銀十萬兩代購豫省賑糧借撥銀十二萬兩直省采買賑糧借撥銀十五萬兩招商局借撥京城平糶資本銀六萬兩現又疊奉

諭旨擬遵撥河閒開井工費銀四萬兩添購京糶雜糧資本銀數萬兩計各省賑務共已撥借銀七十餘萬兩雖借款或議由練餉制錢提還或議分年解繳但既挪動卽少實存此項經費總理衙門與戶部

奏定章程專爲辦防之需不准挪作他用原因海防關繫重大經費籌畫艱難合之則可逐漸經營分之則斷不能集事是以穆宗毅皇帝有亟應堅苦貞定歷久不懈以裕國家久遠之圖之諭我

皇上復有亟宜未雨綢繆以爲自強及此項經費仍遵原奏專爲海防要用毋得再抽分他撥之

諭非不知和議已成我力可以稍息誠以洋務變故難言若無事時以爲可緩一旦有事則已措手不及故

訓誡諄諄以防務爲重而期其必成也今以賑需緊急先後撥借銀至七十餘萬兩不爲不多分濟晉豫至四十餘萬兩不爲不力現僅存銀一百四十餘萬兩雖不足以辦防而事關軍國至計備儲緩急實萬不可少且卽以直境災荒而論自上年四月至今迄無透雨東作難施流亡載道前者尙可擇人而撫今則次貧亦成極貧前者尙有司道庫款可提今則羅掘罄盡去冬及本年上忙丁糧疊請蠲緩收數無幾以之俱應

陵工俸餉旗綠各營兵餉及一切年例支款不敷甚鉅而災重之

河間一府約有戶口二百餘萬此外各屬尙復不少春賑雖竭力籌辦僅夏秋仍應接濟需款奚止百萬直省爲

畿輔重地值此旱荒多事豈能毫無所備臣深知部庫未充疊蒙恩撥晉豫賑款而直省未敢籲請東南各省皆有應解京協餉及捐借晉豫賑款直省亦未敢求助但恃海防經費稍有積存可備意外急需若於已撥晉豫賑款外再議分撥不但無大神補於晉豫而先使

畿輔根本之地空諸所有設遇事變何以支持臣久在軍營每見時會艱難糧石存餉數百萬咄嗟立盡今此區區存款必欲全數倡撥者似由吏事太少慮患未深殊非老成謀

國之道亦顯與慝久

諭旨相違此海防經費不能再撥之實情也天津自同治五年奏

設機器局雇匠購器製造軍火所需經費惟指津海東海兩關四
成洋稅爲專款今欲停減製造其難約有數端該局造成洋火藥
銅帽拉火後門鎗礮子彈等項除本省淮練各營及調防他省各
軍濟川外如熱河察哈爾奉天吉林黑龍江等省征防各軍皆取
給於此江南防軍並須歲撥火藥二三十萬磅銅帽千餘萬顆所
造恆不敷所用前將本省各營鎗礮操法分別忙月閒月定額給
領以期節省子藥今已無可再減其外省尙以領數爲不足屢次
請益或預期各領亦屬無從裁減若停造一年憑何供應若減造
五成斷不敷用況北省伏莽甚多匪徒乘飢思逞時需分投防剿
設軍火無措必致貽誤大局其難一該局所雇華匠皆自香港等
洋廠募來幾經督率殫求西法始能集事若減停製造量予半價
在彼不足自贍勢仍散歸洋廠其學徒亦選練多年手藝已熟一

且遣散必就他圖前功盡棄將來再募又費經營洋匠則有合同年限不論工作有無仍須照給薪費況製造之理百人所造者視五十人成數多三四倍卽如製藥一項初設一礮廠用三四十人迨添四礮廠經工祇用七八十人而出藥已多數倍備工作僅留其半所出軍火不過現在十之三四尤不合算其雉二該局承辦之事不僅製造軍火如駐巡北洋之鎮海操江輪船需煤需料修船修器皆由該局承應連直晉賑糧之福建江南輪船運江浙漕糧之商局輪船一有損壞亦由該局撥工撥料晝夜修辦此外如挖河機器船等類應隨時整理者不少若停辦一年各項皆將坐廢若減去五成顧此必致失彼其難三且津海東海兩關四成洋稅近年收數短絀連招商局輪船四成稅銀併計歲不過十五六萬而應撥各路軍火增多局用日形竭蹶海關六十九結以前四

成稅早經告罄現計定購外洋料物應付價銀三萬數千兩及其
餘逐月用款尙多懸欠暫由海防項下通融勻借是已寅食卯糧
無可提取此製造難以停減及經費不能分撥之實情也至修築
礮臺購買船械等項本因經費支絀未及多辦不過擇要略事經
營實無稍涉鋪張糜費之處臣仍當督飭局員事事核實樽節以
昭慎重除滬局製造能否停減由沈葆楨等奏辦外所有北洋海
防經費天津機器局專款難再分撥緣由理合據實恭摺陳伏
乞

皇太后

皇上聖鑒訓示謹

奏

海運待變請恤船商摺

光緒四年四月初四日

奏爲本屆江浙海運漕糧因南省冬春雪雨過多米價受傷蒸變商船力難全數賠補請查照成案分別辦理恭摺仰祈

聖鑒事竊據沙甯眾船商呈稱伊等承運江浙漕糧歷有年所從無貽誤乃去秋田禾收成之際連月多雨又遭大霧稻穗長莖不足且倒折於泥淖之中米質受傷青腰白臍者不少兼之十二三月間雨雪交加天氣奇冷又復受凍開春以來大雨連番不止各屬運交之米潮溼頗多經滬局一再揀擇退換並由伊等風晾受兌意謂到津不致霉變詎料米質既傷寒庫內斂一經海氣薰蒸卽行發熱至津開驗多變黑色糧道剔除不起之米爲數甚鉅伊等衝風破浪冒險奉公原圖水腳以資餬口若責令賠補卽與船作抵亦萬萬不敷眾商遭此天災實有身家性命之危呈請援救

並據江蘇糧道英樸浙江糧道胡毓筠詳稱本局在滬驗收漕糧
疊經督同員董挑駁計退換者已十之七八乃顆粒雖尙圓勻而
溼氣凍結於內運津開驗乾潔固多霉黑亦復不少竄緣南省冬
春雨雪連綿天氣奇冷米質受傷民間刈穫後勉強過礱又少晴
霽不能一律曬晾前恐變成紫老黑丁米色未能純淨已分別稟
請本省奏咨並報倉場衙門有案向來海運到津米有潮溼應責
令承運商船賠補嚴杜弊混今則迫於天時並非各船蓄舵撓雜
若責令全行賠補爲數過多商力斷有未逮溯查同治五年江浙
海運漕糧因四年秋收適遇陰雨米質蒸變經前天津驗米大臣
單懋謙等奏明將驗收黑丁過多之米另廠分存奉
旨戶部知道欽遵在案本局受傷情形較甚第關繫止供惟有親
督員董認真挑晾選擇將乾潔者兌剝運通及撥交各省濟賑等

變太甚者卽行剔除飭令賠補其米色較次內有黑丁尙堪起用者請照成案運通驗收完廢分存搭放具詳請奏前來臣訪詢南來之人言蘇浙陰雨情形與該糧道及沙甯船商所稟無異此次米質之壞係由天時所致勢出於無可如何近年沙甯船生意爲洋船所奪實形苦累若必全責賠補力有未逮似應如該糧道等所詳援照同治五年成案分別辦理以恤商困而於倉儲亦尙無出入除仍飭認真挑驗選擇運通撥賑並分咨戶部倉場侍郎暨山西河南各撫臣查照外理合恭摺具陳伏乞

皇太后

皇上聖鑒訓示謹

奏

葉源濟容增祥請照原保片

光緒四年四月初四日

再臣等辦海防於西洋軍火器械隨時訪察購備以資利用上年八月間據管帶幼童駐洋肄業委員二品頂戴補用道容閎稟稱美國現造雙管加那後門鋼礮及沙布後門兵鎗爲外洋新式軍械先購加那鋼礮一尊礮子四萬顆沙布兵鎗三百桿格林礮子五十萬粒及礮車鎗帶等件俱全所需價值其英洋一萬六千一百三十三圓內由幫理駐洋局務委員候選光祿寺典簿葉源濟候選內閣中書容增祥各捐英洋一千五百圓其餘一萬三千餘圓概由容閎自行捐備呈請查核等情臣查該員等捐辦後門鎗礮各件現已陸續運到驗收經臣親加演試精堅致遠洵推攻剿利器惟價值甚昂雖據稱情殷報效不敢仰邀議敘然該員等深明大義捐助軍需自應量予獎敘容閎容增祥葉源濟三員自同

治十一年選帶幼童赴美國肄業重洋遠涉備歷艱辛均係異常出力光緒二年臣會同兩江督臣沈葆楨奏保辦理幼童出洋肄業滬局事竣出力人員請獎案內將花翎五品銜內閣中書容增祥擬請免補中書以主事分部行走花翎五品銜光祿寺典簿葉源濬擬請免選本班以中書科中書不論雙單月儘先選用嗣經吏部議奏以定章局務出力人員祇准保舉升銜加級等項該員等所請官階班次與例不符駁令另核請獎迄今尚未聲明勞績覆奏查容閱現蒙

派充美國副使葉源濬亦經陳蘭彬奏派出使隨員容增祥在美國照料學生七年之久竭誠盡心結實可靠核其異常勞勩實非內地承辦局務人員可比茲復捐購緊要軍器有神海防其好義急公之忱尤堪嘉尚合無仰懇

天恩俯准將三品頂戴補用道容閔交部從優議敘容增祥葉源
溶二員各仍照原保官階班次

敕部核准註冊勿再援例擬駁以示旌異理合附片陳請伏乞

聖鑒訓示謹

奏

薛福成辭參贊片

光緒四年四月初四日

再臣接准總理衙門咨開遵議出使德國大臣奏調參贊分別等差辦理一片奉

旨依議欽此鈔錄原片恭錄

諭旨咨行到臣查原議派充出使德國參贊二員所有派定二等參贊李鳳苞前經管帶船政學生出洋應由該大臣劉錫鴻自行飭知外其派充三等參贊候補知府薛福成前在直隸當差光緒三年正月二十三日告假赴山東省親旋丁母憂扶柩回籍經臣咨報吏部在案前接總理衙門來文並接劉錫鴻函稱襄贊需人囑臣飭令薛福成作速出洋俾資臂助臣當卽札飭該員知照茲據薛福成稟稱丁憂人員例應終制出使參贊職守綦重實與居官無異劉錫鴻奏調時想係未聞該員丁憂信息懇奏明撤銷差

事等語臣查丁憂人員照例不准當差雖辦理洋務稍與他事不同然苟非萬不得已自當遵守定章以敦風化丁憂知府薛福成以玉帛冠裳之會未便以素服從事情詞出於至誠所有派充出使德國三等參贊應卽請

旨撤銷

敕下總理衙門及出使德國大臣另行揀派以資襄助理合附片具陳伏乞

聖鑒訓示謹

奏

查覆漳沱河工難辦摺

光緒四年四月初四日

奏爲漳沱河工程艱鉅鹽務無款可籌勢難興辦恭摺仰祈

聖鑒事竊臣欽奉光緒四年二月初八日

寄諭御史劉恩溥奏請籌辦直隸河道以工代賑暨鹽斤加價提
作商捐以治河道及由運庫墊款興工各摺片所稱修理河道宜
先治漳沱河請闢治河以分水勢塞改道以復故瀆治子牙河黑
龍港河以疏下游旣可以工代賑亦免頻年水患新准鹽商二文
加價提作商捐歸公辦賑於水利鹽務工賑均有裨益加價如何
捐繳令各商平議款項未能遽集先由運庫墊發興工是否可行
著李鴻章酌度情形奏明辦理等因欽此伏查直隸通省七十餘
河大者有五漳沱河居其一源出山西繁峙縣入直隸平山縣境
會治河經藁城等縣下會滏陽河至獻縣子牙河達津入海其至

平山以下正當出山之後迅流急湍挾沙壅泥易淤舊徒向無隄防修守藁城東鹿深冀一帶南北縱橫皆其故道然總以滏陽爲遠海之路同治七年由藁城改道北徙遂不與滏陽相通因漫及沿河藁城晉州無極深澤安平饒陽獻縣肅寧河間任邱雄縣保定等處地面祁州博野蠡縣高陽東鹿深州亦有昆連之區而下游文安大城水無出路被淹尤甚滏陽河舟楫艱阻鹽貨難行臣經詳查委勘擬開治河復故瀆以濟沈災而工程殊無把握按漢書地理志上艾縣注縣蔓水東至蒲吾入岸池縣蔓卽治水蒲吾卽平山岸池卽滹沱是治水本有入滹沱之路非元初鑿而始合又元史河渠志至元三十年正定路請開治河越三年爲元貞元年興工越十四年爲至大元年治河口淤塞復入滹沱嗣後旋開旋淤我

朝雍正三年怡賢親王雖有塞治不使入淖之奏並未施工是元代卽已仍舊會流非近時始合爲一凡治水必以地勢高下順逆爲衡據勘舊治河底高於現行之河水面數丈低昂相去懸遠勢難逆挽而行而治河口至入淖沱十里之間則上高於下數丈水性就下自然奔入淖沱恐非壩工所能抵禦且舊治河須會洩河入甯晉泊今泊已淤墊亦不能容巨水其河身二百里間之淺隘更無論矣此關治河之難也彙城淖沱河據勘前年盛漲之際走溜河槽寬至七百二十丈深至一丈一尺五寸而同治七年以前故道現在至寬不過三十五丈窄者僅二丈至深不過七尺淺者僅一尺其間淤成平地者不少河頭高於現行河底一丈一尺有奇通工二百里無從挖起曾國藩前有挽復咸豐元年以前邵村故道之議里數不甚相懸間有寬深之處當時委員僅擬挑河寬

十餘丈至二十丈深數尺至一丈連壩工已估需銀二十餘萬兩旋以無款中止此時非再加寬深不能掣引大溜而博訪眾論謂該河剽悍激烈遷徙靡定自來不受約束隄防愈堅衝決愈甚其下又有伏流往往水尙未至土已迸裂立壩於伏流之上勢難久峙挑築亦屬徒勞此復故瀆之難也舍此二者別無善全之策況直省向係缺額加以連年災歉庫儲空虛商民交困實無財力議興大工近歲量就賑款勻撥以工代撫僅於河獻文大等處開挖引河修築隄埵俾山路稍暢旁近民田略可攔護並酌修子牙河隄議疏黑龍港以爲逐漸經營之計直隸河務廢弛已久五大河中之永定河大清河北運河南運河率多淤淺坍塌皆關民生利害又不能不並顧兼籌隨時設法補救且奉撥賑款本以分給災區其應賑者非盡沿河之民勢不能趨集一隅皆令供此一役也

今劉恩溥擬提蘆鹽加價二文以充渾沌工費若果易於攤繳能
集巨款正可設法圖維冀紓水患其請勻引酌劑嚴中融銷代銷
等禁於鹽務情形尙多隔膜查豫省蘆岸加價係彌補柴工經費
按年解部無可再提直岸所加之二文本因商累過深暫資體恤
蓋自道光年間清查以後前商虧空課帑數千百萬皆責現商捐
攤交款加重連年災歉灘鹽歉收諸物昂貴成本倍增上年直豫
大旱河運不通硝鹽徧地窮民死亡相繼銷數大減有僅銷額引
一二成者甚有停秤者直屬近年出庫引止二十餘萬道其領引
未運及運而未銷者亦在其內若今年春運直豫各岸現僅過關
鹽一萬七千餘包原奏謂歲銷六十五萬引但就應領額數而言
尙未知實領實銷之數且實銷之鹽亦有不盡能加價者一則自
姓貪賤食私官鹽賣則銷愈滯一則累商鹽至引岸諸債蜩集往

往減價求售故商民尙不至因加價結怨也康熙年間長蘆額引九十餘萬道每包鹽重二百五十斤納課銀四錢有奇然雍正二年巡鹽御史莽鵠立奏言每屆奏銷已有積存未領引二三十萬道嗣後鹽與課逐漸加增至道光時每包鹽重至五百數十斤課帑至一兩以上其難攤各款尙不在內今雖減至六十餘萬道實則中稔之年只能銷至四十餘萬道引滯則課須包賠是以愈久愈疲殷商家又值奇荒之歲運售尤艱無論殷商累商皆須虧本臣與運司通盤籌酌尙須量議調劑實難再提加價運庫因淤解上年京協各餉羅掘一空更無從籌墊工費至融銷代銷載在鹽法志及奏定章程本無例所不禁緣各處鹽引皆有定額不准互相增減其銷滯者祇許暫將引目勻給暢岸之商領運銷賣津貼運商銀三四五錢不等課帑均歸運商完納是爲代銷若鹽已

築成勻給暢岸之商銷賣原商可得成本以完課帑是爲融銷融代者乃不得已酌劑之法必由運司查核明確詳請立案並非任商自爲若統計各岸銷數先由官爲勻濟微特孰暢孰滯應以年歲豐歉爲憑不能先時預定近且十岸九滯直豫額引出庫者不及四十萬道則下餘之二十餘萬道又從何處濟銷惟期此後暢雨應時人民復業銷數漸暢商力漸紓仍隨時督飭運司察酌籌維嚴查私相融代借名侵灌及夾帶攙和等弊以期保全課本所有查明潯沱河工程艱鉅鹽務無款可籌勢難興辦各緣由理合恭摺覆陳伏乞

皇太后

皇上聖鑒訓示謹

奏

張家口糧臺請餉摺

光緒四年四月初四日

奏爲張家口糧臺采辦各路軍糧懇

恩照案續撥部餉恭摺仰祈

聖鑒事竊查前因烏里雅蘇臺等處調兵防剿遵

旨任張家口設立糧臺采辦各路軍糧奏明請撥部餉以爲米價
繩袋員役薪工之需自同治九年十二月起已十次奏撥部餉飭
委口北道分起采辦截至光緒三年年底實存正款餘平其銀一
萬四千餘兩均經造報在案茲據口北道王珩稟稱烏里雅蘇臺
防軍口糧催提甚急四月間牛車開行亟應啟運核計一歲之糧
其需米價繩袋等項銀三萬數千兩又駐紮庫倫之宣化練軍現
擬撤回另調察哈爾馬隊五百名前往換防已奏明將庫倫運腳
銀兩仍照原數請領節省運腳作爲察軍采買米價其不敷之款

以及繩袋等銀均在辦運烏城軍糧部餉內添支核計現存銀一萬四千餘兩實不敷用至庫倫運腳僅存光緒四年秋冬銀四千七百餘兩該處防軍須於牛車開行時預運今年秋冬來年春夏之糧則來年運腳亦應預領支用方免貽誤彙請奏撥等情前來臣查該道所稟關緊邊防軍需勢難延緩相應仰懇

天恩敕下戶部照案續撥辦運烏城軍糧銀三萬兩又辦運庫倫光緒五年分軍糧庫平銀一萬四千六百兩以期無誤軍食理合恭摺具陳伏乞

皇太后

皇上聖鑒訓示謹

奏

蘆鹽請緩奏銷摺

光緒四年四月初四日

奏爲援案請緩長蘆木屆正課奏銷以恤商艱恭摺仰祈

聖鑒事竊據長蘆鹽運使如山詳稱蘆商正課例限五月奏銷自同治十年後疊遭災歉節經詳請

奏准緩至十月啟徵茲以例限將屆催令各商完納據通綱商人晉有孚等稟稱蘆綱本重銷滯歷年商累已深去歲直豫大旱成災河道異常淺涸硝鹽到處充斥艱於運售且冬雪稀少春雨愆期各處災困益甚窮民死亡相繼銷數更減於前現值起運各省賑米喫緊船隻更難覓雇春運過關者僅一萬七千餘包實爲向來所未有商力萬分竭蹶勢難按照從前例限完課懇仍援案展緩該運司詳加體察委係實情若將本屆正課依限奏銷徒事參追無裨實濟請仍緩至十月啟徵等情具詳前來臣查長蘆正課

前因商情艱窘請展緩均經奉

旨允准本屆災荒尤重力更難支相應籲懇

天恩俯准將光緒四年正課奏銷照案緩至十月辦理屆時由臣督飭運司實力催徵以濟餉項理合恭摺具陳伏乞

皇太后

皇上聖鑒訓示謹

奏

截漕輕齎剝價請扣留片

光緒四年四月二十日

再欽奉三月二十二日

上諭直隸災黎甚眾加恩撥給江蘇漕米十二萬石江北漕米四萬石妥爲賑濟此項漕糧由津至通應支剝價銀兩經剝耗食米石等項卽飭各該糧道核數扣解津貼運費等因欽此又接准戶部三月十三日奏片內開上年提辦江廣漕米五萬石撥運山西係將由津運通各款經費作爲貼補轉運之需又山西奉撥東漕八萬石係將隨漕輕齎等項銀兩一併照數撥作運費今於二月十九二十等日奉旨截留南漕分撥晉豫十六萬石並借撥豫省秬米十萬石所有由津至通一切經費應照截撥江廣山東漕糧成案全數扣交等因奉

旨依議欽此知照前來臣查直屬久旱民飢賑需不給仰蒙
特旨賞撥漕米及剝價耗食米等項

恩施優渥足以起瘠噓枯官民同聲感泣遵卽就近截留酌量各
屬災分重輕分撥飭催迅速領運一面遴派妥實員紳確查戶口
以便糧到散放接濟惟糧石分運各處程途遠近不一核計需費
甚鉅自去夏至今疊次籌辦賑撫未敢請撥

內帑早將庫款羅掘一空現在運費無措飢民待哺嗷嗷斷難緩
運查輕齎等項本係隨漕用款米既撥賑用款隨米解支事實公
允自應欽遵

諭旨並查照部議成案將奉撥直賑漕米項下隨漕輕齎剝價等
項津通應支一切經費及經剝耗食米石全數扣出解交直隸津
貼運費其不敷之數尙多再竭力設法籌措至晉省奉撥賑米

八萬石應於蘇省漕糧撥給丁壽昌等分起轉運豫省奉撥借撥賑米十八萬石除已將東漕抵撥外尙應在津領運浙江和米八萬八千餘石已經李鶴年派委道員啟纘王文錦來津請領該兩省籌款艱難運費皆無所出承運之員幾致束手並應各將撥賑漕米項下隨漕輕齎剝價等項津通應支一切經費及經餉耗食米石全數扣出分別解交津局及豫省領米委員查收湊作運費庶三省億萬窮黎及時得食免致忍飢久候以仰副

朝廷溥惠災區有加無已至意除分咨倉場侍郎江浙督撫並札蘇浙江安各糧道遵照外理合附片具陳伏乞

聖鑒訓示敕部知照謹

奏

抵撥閩省京餉請緩解片

光緒四年四月二十日

再准戶部咨天津關欠解光緒三年分應還洋款改解部庫抵撥閩省京餉銀二萬兩未據報解奏請將天津關監督交部議處仍催令報解等因當經轉行遵照茲據署津海關道丁壽昌詳稱該關欠解前項銀二萬兩實因稅項短絀無款可籌業將關庫入不敷出情形疊經奏咨有案近年所收六成洋稅留撥本口征防練軍餉項本已竭蹶異常況值北數省災荒甚重貨物滯銷進口之火輪夾板大半裝載米麥稅應優免收數更大減色關庫搜括一空欠發軍餉甚鉅兵士懸釜待炊情形危迫且奉撥

惠陵工款要需尙不知從何籌措所有三年分抵撥閩省京餉委難設法補解惟有俟年歲豐稔洋稅暢旺再行酌量勻撥等情具詳請奏前來臣查該道所詳均係實在情形明知京餉關係緊要

而值此旱荒奇災貨無銷路稅項益絀上年欠解抵撥閩省之項
事出有因應請准俟洋稅暢旺再籌彌補以恤災區理合附片具
陳伏乞

聖鑒訓示謹

奏

臺灣紳捐借撥濟賑摺

光緒四年五月十四日

奏爲臺灣紳士原捐鐵路經費遵將已解之款酌核分借豫晉濟賑恭摺仰祈

聖鑒事竊臺灣紳士林維源林維讓兄弟原捐臺地鐵路經費前經河南全數奏借辦賑其時前福建撫臣丁日昌未知河南先已奏借遂疏請酌量借濟晉豫經戶部查照丁日昌原奏議由臣酌量兩省待賑情形察核南北米價貴賤或解銀或購米酌定辦法知照福建督撫臣分別辦理並令臣將洋元核成銀數行知請借省分籌措的款歸還等因奉

旨依議欽此遵查臺灣米價較貴購運甚不合算且河南已在鄰近鄂皖等省購米轉運亦便所缺在銀而不在米應令解銀到津酌撥轉解濟用卽經咨會閩省查照一面咨商請借省分先籌的

款議定歸期免誤原捐臺灣海防要用疊准豫督撫臣面請均須
借撥而豫省則商請全數濟豫臣維兩省被災均重待賑皆殷但
此款究係豫省全數奏借在先丁日昌續咨又以河南疊雨告急
屬先運豫接濟查林維源等先繳臺灣道庫洋銀十萬圓除去銀
水匯費實折解銀六萬六千一百九十一兩七錢四分四釐續繳
洋銀十六萬圓實折解銀十一萬三千七百七十七兩七錢七分
八釐共合銀十七萬九千九百六十九兩五錢二分二釐現經商
定借給河南銀十四萬九千九百餘兩准撫臣涂宗瀛來咨已經
督同司道籌議循照該省奏定章程即指豫庫地丁項下劃出有
著此款自光緒五年起分三年歸清每年均俟秋成後由藩司劃
撥委解應即照此定案其餘三萬兩借給山西以濟賑米運費在
撫臣曾國荃來函亦必籌定的款分期解還臣已將解到天津之

六萬六千一百餘兩發交河南委員知府朱壽鏞帶解回豫其餘十一萬三千七百餘兩業經閩省報解俟解到卽按所定之數分解清款至林維源等原捐洋銀五十萬圓除前由閩省自行購米濟賑核抵五萬圓現在借撥晉豫共合二十六萬圓尙應繳十九萬圓原限本年三月以後分作十箇月攤繳部議亦令源源解津以備賑款頃接丁日昌函稱林維源赴揭陽稟商經該前撫勸令提前趕解由臣隨時察看直晉豫賑務緩急情形再行分咨酌辦除俟該紳等捐項全數繳清由福建督撫臣遵照部議奏懇恩施破格優獎外所有臺灣捐款酌核分借豫晉濟賑緣由理合恭摺覆陳伏乞

皇太后

皇上聖鑒敕部查照謹

奏

丁日昌勸捐得力片

光緒四年五月十四日

再前福建撫臣丁日昌春閒請假在籍臣因晉豫奇災賑款無措稔知該前撫臣素以救民爲心又熟悉南中紳富呼應最靈諄請力疾就地勸捐助辦該前撫臣接信後義形於色召集潮州香港一帶紳董竭誠勸募驟獲巨款各董事捐戶先案札諭實收爲憑該前撫臣雖養病閒居自以受

恩深重時勢艱難不得不權宜緩急

奏明刊刻關防印發實收俾昭大信昨接該前撫臣自揭陽函稱前後經手籌勸捐數除臺灣林維源等五十二萬圓外潮州約三十萬圓南洋香港新嘉坡小呂宋暹羅越南各埠約十六萬圓臺灣約七八萬圓合計已逾百萬現仍廣爲勸助其任事之勇救災之誠卽此一端已爲人所難及惟旣蒙

恩開缺各處紳商或已書捐而未繳清或已領實收而未換照造冊頭緒紛繁亟須逐漸清理誠恐各捐戶聞知該撫臣業經開缺繳款不免遲延且距臣處太遠遇有專奏請獎事件未能及時核辦亦無以昭激勸擬請

旨准令該前撫臣於賑捐未竣之前仍專摺奏事俟捐務告竣再將前刻關防銷燬庶捐款可剋期繳解督豫噉噉待哺之飢民稍有指望如蒙

俞允卽由臣咨行該前撫臣查照謹附片具陳伏乞

聖鑒訓示謹

奏

臺灣道捐賑片

光緒四年五月十四日

再晉豫大旱成災賑需不敷全賴各省捐助福建臺灣道夏獻綸於內地未經議捐之時先倡捐洋銀一千圓並率同文武僚屬共湊成銀三千三百兩除去匯費實解到天津銀三千兩嗣奉前撫臣丁日昌函飭又勸諭紳民集捐現又報解洋銀二萬圓合銀一萬三千六百兩據稱尚可續捐數萬兩該道遠官海外憫恤鄰災力籌助賑具見其體時艱顧全大局殊堪嘉尚雖據稱不敢邀獎但倡勸捐濟鉅款未便壟於上聞擬請

旨敕部將該道夏獻綸從優議敘以示鼓勵至此項捐款容臣隨時分解晉豫濟用其餘捐銀官紳飭局照章核獎理合會同前福建撫臣丁日昌附片具陳伏乞

聖鑒訓示謹

奏

林維源母請匾額片

光緒四年五月十四日

再准前福建撫臣丁日昌咨稱據臺灣紳士三品銜候選道林維源稟因回籍捐繳五十萬圓奉親母鍾氏之命以現聞晉豫久旱奇災

朝廷宵旰焦勞願竭私囊二萬圓捐助晉豫賑款旋經林維源分兩次解到由該前撫寄解津局分撥晉豫以濟賑運查林維源前捐修鐵路洋銀五十萬圓因晉豫賑務緊要勸令先繳二十六萬圓並由林維源代其母林鍾氏另捐賑銀二萬圓均經丁日昌奏由戶部議准以該紳等踴躍捐輸其母又捐助賑務洵屬深明大義應俟款項繳清後奏請破格優獎奉

旨依議欽此除五十萬圓一款俟全數繳清再奏請破格優獎外現在該二品命婦林鍾氏加捐二萬圓分助賑務業已如數解清

擬請會銜奏懇

特賜御書匾額以示優獎等情前來臣查該紳林維源兄弟捐助巨款五十萬圓合銀三十六七萬兩之多爲百數十年來海內未有之事丁日昌勸令移助賑需存活飢民不下數十萬人洵爲莫大功德茲復恪遵母命另捐普豫賑款二萬圓實屬深明大義亟應遵照部議破格優獎以勵薄俗查浙江紳士道員胡光墉疊承母命捐助直賑復捐交甘肅棉衣二萬件同治十二年四月間經陝甘督臣左宗棠奏請

特恩賞給伊母胡金氏匾額奉

旨著照所請

賞給胡光墉之母勉善承榮匾額一面欽遵轉行在案今林維源兄弟所捐巨款較胡光墉歷次捐數爲更多其母復加捐賑款二

萬國較胡金氏捐助棉衣尤有實濟相應援案籲懇
天恩俯准

特賞道員林維源之母林鍾氏匾額以示優異而資觀感謹會同
前福建撫臣丁日昌合詞附片具陳伏乞

皇太后

皇上聖鑒訓示謹

奏

外國捐賑請嘉獎片

光緒四年五月十四日

再臣欽奉光緒四年四月初六日

寄諭巫來由國王捐銀千圓該國向無與中國交涉事件應如何辦理之處著斟酌妥辦香港駐埠之英國總督燕軒尼士的勒捐賑銀五千圓亦屬好義應否酬答並著該督等酌度具奏等因又奉四月二十四日

寄諭前據總理衙門王大臣面奏日本人捐助山西賑糧當以轉運艱難力為勸阻嗣據李鴻章函致該衙門米已運至天津等情外國捐銀米助賑名為善舉實則流弊滋多茲據羅鴻禔奏英人攜銀前往晉豫散賑即著曾國荃徐宗瀛婉為開導設法勸阻至販賣婦女出洋本干例禁著督飭地方官實力稽查嚴行禁止儻有奸民漁利轉販即查拏照例懲辦等因欽此伏查自同治十年

天津水災之後外國官商間有捐銀助賑爲數尙不甚多光緒元年山東青州等屬旱災各口流寓洋人捐集銀數萬兩由英國教士李提摩太帶往散賑辦理頗協輿情上年晉豫旱災疊據駐津英領事佛禮賜函報西國人已集有銀五萬餘兩助賑晉省飢民仍請李提摩太前往會同該地方官紳查戶散放業據三次解送銀四萬兩因係善舉未便勒阻節經臣分咨總理衙門及山西撫臣在案嗣准曾國荃函稱該教士等在晉查放尙屬妥協日本使臣森有禮過津談及該國商民捐助晉省賑糧臣告以山西道遠費重轉運維艱不如就近搭放津郡粥廠飢民該使亦以爲然旋據日本營士竹添進一運到大米四千五百四十餘石小麥一千七百餘石又大錢一千串當交粥廠各委員妥爲經理搭放臣並面屬森有禮回國便爲道謝矣臣訪聞西洋通商有約各國遇有

水旱災荒互相捐助賑濟乃交際之常情尙有古人患難相恤之誼現因北省奇災各國官商捐銀捐米助賑無非感慕

聖主懷柔之德樂效輸將並無他意似亦無甚流弊據津海關稅務司德耀琳面稱西國遇有此等美舉該國王及外務衙門必向捐賑之國使行文稱謝無須另議酬答頃招商局道員唐廷樞等稟稱接據新嘉坡領事胡璇澤面稱駐新嘉坡之英總督亦捐洋銀五千圓又巫來由國王所捐洋銀可否請給樂善好施匾額等情臣查香港新嘉坡之英國總督各捐巨款應由臣與丁日昌分函致謝巫來由國王雖向無交涉既經捐銀助賑可否由臣繕給樂善好施匾額傳

旨飭寄祇領伏候

命下遵行英國倫敦商民疊捐巨貲除已由駐英使臣郭嵩燾致

謝外可否

敕下總理衙門王大臣函致該國駐京使臣傳

旨藉獎以慰遠人慕化之誠至瞿鴻禨奏稱該國收買流民婦女
臣督同署津海關道丁壽昌密確查察實無其事天津各粥廠流
民七萬餘人婦女居其大半容有中國奸民轉販者隨時訪拏嚴
懲此風近已稍息並未聞洋船販帶婦女遠出之事所有各國捐
助銀米酌量酬答並查拏轉販流民婦女各緣由理合附片詳細
覆陳伏乞

聖鑒訓示謹

奏

洋米無庸購運摺

光緒四年五月十四日

奏爲洋米未能合算現可無須購運恭摺仰祈

聖鑒事竊准部咨光緒四年二月十七日奉

上諭國子監司業賈廷奏北省運米過多南省因之米價日昂請
飭采買洋米等語著南北洋通商大臣悉心斟酌如果可行卽選
委委員前往采買源源運解以濟民食其如何酌定章程俾商賈
踴躍販運之處並著妥籌辦理等因欽此當飭江海關道並輪船
招商局確細查訪旋據該道局稟覆前來臣等查該司業原奏內
稱西貢去歲大稔米價甚廉本埠船多水腳亦賤統計每石洋銀
二圓並聞舊金山等處米多已多可以設法采買請察訪確實委
員並招商往購等語查西貢爲越南國之瀕海地面係法國所開
碼頭中國已於該口設有招商分局該分局董事張霖在西貢二

十餘年熟悉情形無論官辦商運皆可就地經理且有現成局船便於裝運但米糧不如內地之合用腳價亦無節省據該道局稟稱西貢係屬糙米且多覆殼質性又不膠黏於各省民食不甚相宜向惟廣東就近購用以濟缺乏近因該省及印度水旱成災西貢米價增長每糙米百斤須洋銀一圓八九角若運至香港轉運天津須加水腳洋銀一圓零按一百五十斤爲一石即合銀三兩二三錢而蘇皖一帶熟米運至天津統合價腳銀三兩五六錢較三兩二三錢之糙米且無膠性者實爲合算商人信息較靈鎔銖必計若價腳便宜無不羣往販運今廣東米商尙多赴上海鎮江采辦則西貢之價腳非賤可知至舊金山只有麪粉向運廣東現計每百斤合價腳銀四兩若再運津又費一層水腳更貴於非省之值臣鴻章前與出使日本大臣何如璋往返函商擬購東洋

米麥亦以價腳未甚合算而止況無大宗銀款官亦難於購運現在直晉豫等省皆得透雨秋禾已可普種奉天江浙米糧得經官辦商運源源而來尙非缺乏自毋須再辦洋米至晉省山路險遠駝少運艱腳費太鉅患在難運而不患無米豫省於江皖鄰境就近購運較爲便捷患在缺銀而亦不患無糧謹合詞恭摺覆陳伏乞

皇太后

皇上聖鑒謹

奏

朱其昂請卹摺

光緒四年五月十四日

奏爲道員承辦軍務積勞病故懇

恩優卹恭摺仰祈

聖鑒事竊二品銜遇缺題奏道朱其昂經臣於同治十一年奏委
創辦輪船招商局爲中外通商以來未有之事其時中國江海利
權已爲洋商佔盡聞有此舉百計阻撓卽華商亦壯於積習相率
疑懼該道以此事爲洋務一大關鍵力排眾議獨任其難先在滬
津設局竭誠招股集貲購船壹意創辦迨規模既定眾論漸平洋
商又屢次跌價傾擠而商局以協運江浙漕糧爲根本該道悉心
經畫聯絡官商力爲拮据頻年與會辦各員計議開拓添置船隻
增設碼頭除行走南北洋及長江各口岸外又撥輪船往來日本
長崎及英屬新嘉坡等處利權逐漸內移辦理已著成效協運漕

糧係該道專司其事疊經輾轉輸毫無貽誤並經辦江西湖廣等省漕糧承購承運核實妥速直省連年水旱該道節次捐賑辦糶稽濟民食又以晉省大災疊辦賑糶各糧源源運濟復捐巨款助賑並購辦豫省賑米事務愈繁焦勞愈甚雖當冰雪嚴寒不少休息近因京城平糶往來跋涉心力交疲四月間感受風寒倍常委頓尙以責無旁貸力疾支持不期積勞已深病勢日重竟於五月初一日歿於天津差次彌留之際猶諄諄以局務賑務爲念續籌銀兩捐濟賑賑其公而忘私之概至死不移據會辦局務道員唐廷樞徐潤盛宣懷稟請

奏卹前來臣查該故道朱其昂籍隸江蘇上海由浙江寶缺同知海保道員才識過人勇於任事其歷年籌辦各務皆有裨於國計民生輪船招商尤關中外通商大計直晉豫賑全活飢民

甚多今歿於差次追念前勞實堪憫惜該故道本係總理商局之員辦理洋務服務重件積勞病故迥與尋常差遣人員不同相應仰懇

天恩俯准敕部將二品銜前浙江巡缺題奏道朱其昂從優議卹以慰靈魂而示激勸其所遺招商局務京城及直晉賑賑各糧事宜卽令該員兄弟候選郎中朱其純湖北候補道朱其詔分往接辦並清理未完事件該二員本在商局會辦襄辦情形熟悉可免貽誤合併聲明理合恭摺具陳伏乞

皇太后

皇上聖鑒訓示謹

奏

京城平糶派員接辦片

光緒四年五月十四日

再京城平糶事宜前已奏派招商局道員朱其昂借撥海防經費銀兩購運南省大米並派知府惲桂孫等赴京於正陽等門外分設三局開辦在案嗣議添購奉天雜糧又由臣借撥海防經費銀五萬兩戶部撥給漕折銀四萬兩飭朱其昂陸續購運茲朱其昂病故卽派招商局湖北後補道朱其詔駐津接辦其京局雜糧糶務添派遇缺題奏道何維楷會同惲桂孫妥商籌辦至雜糧必須碾磨始便民食京城惟雜糧小鋪有碾磨之具向來該鋪糶糧於市磨就出售今惲桂孫等擬運雜糧至京由局按照市價每石酌減銀一二錢發糶自一二升至數石均聽其便庶糧鋪糶價既輕售價自減民受其益或由大宛兩縣擇傳殷實糧鋪領糧磨麪交局出糶已令該員等赴京妥細察酌因地制宜並稟商步軍統領

順天府尹五城御史核飭辦理至設局處所應仍就正陽等門外原定三局地面以便各衙門照料防範現在近畿得雨深透徧種秋禾俟八月後成熟糧價漸平卽仿照案截止所有京城增糶雜糧現辦情形及派員接辦緣由除分咨查照外理合附片具陳伏乞

聖鑒謹

奏

籌墊河間賑款片

光緒四年五月十四日

再四月十五日以前直境連次得雨未耕之地皆可翻犁播種臣因河間府屬阜城獻縣交河景州東光等處受災最重情形極爲困苦丁壯歸耕籽種無出當於海防經費項下借撥銀三萬兩並勸集京外捐款專爲助給籽種之需商令編修吳大澂道員盛宣懷同知李金鏞等督飭查放此外災區或於賑糧糶價內勻發籽種或動用本處捐項或令紳富就地借貸業經奏報在案查阜城係專用李金鏞募捐之款獻縣原撥銀一萬兩又續借給銀一萬兩景州原撥銀二萬兩月行借給東光銀一萬兩共計北洋海防經費項下已借撥過籽種銀五萬兩俟由南省集捐歸墊交河撥給京外捐款銀一萬五百兩惟據吳大澂等函稱東光交河就田核計均不敷放須再撥銀二萬兩正慮無款可措欽奉五月初十

寄諭現在籌給河閒府災民籽種款項不敷著於南洋經費分撥
晉豫賑款劃出銀二萬兩由戶部指撥各省關徑解李鴻章兌收
先行籌墊散放等因仰見

朝廷憫念災黎之苦曲體籌款之艱

聖慮周詳

恩施優渥官民感激涕零遵卽設法籌墊銀二萬兩派員星夜解
交吳大澂接收分運交河東光由該編修察酌情形督飭地方官
紳核實查放俾無力窮農咸得及時耕作可望秋成此次所墊銀
兩俟各省關解到卽行歸款至直境自四月十五日以後時有雨
澤五月初八九日又得雨深透人心漸定所有遵
旨續撥河閒府屬籽種緣由理合附片具陳伏乞

聖鑒謹

六

沈兆雲請祀鄉賢摺

光緒四年五月十四日

奏爲已故紳士耆德夙著懇

恩入祀鄉賢恭摺仰祈

聖鑒事竊查頭品頂戴原任浙江布政使沈兆雲籍隸天津由嘉慶丁丑科進士散館授職編修出守松江值歲旱碾發倉穀捐廉平糶修濬白茆河劉河以工代賑全活甚多居官所至以廉惠稱咸豐三年在署河南藩司任內值粵匪北竄津省戒嚴募兵籌餉守城待援卒能力挫兇鋒保全大局得

旨嘉獎歸田後主講輔仁書院每以敦品勵學誘掖諸生文風蔚起從游之士薰其德教皆讀書植品以學行相切磋天性孝友事親盡禮自少講求程朱之學一以誠敬爲主視聽言動悉循禮法正襟危坐終日無惰容致仕數十年足跡不入公門而遇地方重

要事件如同治七年捻逆竄近上書前通商大臣崇厚豫籌防剿
十年直屬大水捐貲修埵函致司道籌疏濬之策光緒二年春旱
復致書於臣請倣春秋繁露法祈雨並清釐庶獄又以所著戒訟
說好人歌徧貽鄉里人多化之生平研究經史性理諸書殫心纂
述著有義利錄實心編易義輯聞尙論編發聲錄唐文拾遺織簾
書屋詩文鈔詠史詩鈔各種任江安糧道十二年於運河水道畿
輔水利留心考究采輯

國朝名臣奏議及碑銘記傳之文手錄成帙爲蓬窗錄刊行於世
嘗取津郡先輩姓氏著爲仰止編又搜羅前人著作釀貲代刊凡
所著錄均有關於世道人心年逾九十神明不衰同治庚午科重
宴鹿鳴蒙

恩賞加頭品頂戴光緒二年在籍病歿由臣奏蒙

加恩予諡在案茲據天津府在籍紳士前閩浙總督張之萬前吏部右侍郎孫葆元四品銜焦祐瀛等公呈臚列事實造具冊結懇入祀本籍鄉賢祠聲明該故紳子孫並無現官九卿及曾任九卿者與例相符等情請

奏前來臣查沈兆澐品端學粹操履清嚴歷官中外四十載政績卓然可傳晚年爲善於鄉碩德耆英遠近翕服洵足模楷士林以之從祀鄉賢允無媿色既據合詞呈請相應據情籲懇

天恩准將頭品頂戴原任浙江布政使沈兆澐入祀本籍天津縣鄉賢祠以勵儒修而孚士望除將送到事實冊結咨部外理合恭摺具陳伏乞

皇太后

皇上聖鑒訓示敕部知照謹

奏

官輪運糧濟賑請獎摺

光緒四年五月二十九日

奏爲官輪船轉運奉糧以濟直晉賑需酌保出力員弁恭摺仰祈
聖鑒事竊直隸應需賑糧前經派員馳赴奉天營口等處購辦除
上年封河以前雇船運回撥用外其續購春賑之需及奉省捐濟
山西糧石因商船承運商米難以兼顧遂咨調閩廠並江南官輪
船四號於今春開河後陸續至津與津口原有輪船往來輓轡裝
運卽由原購之員在營口兌交並派員在津隨收隨發各該船管
帶等深知兩省災黎待哺嗷嗷不避艱險實心實力趕速輓輸其
購辦收發各員亦復撙節經營晝夜辛苦其計奉糧十數萬石剋
期運竣及時分撥接濟民食所省經費尤多不無微勞足錄據籌
賑局及山西轉運局司道詳請前來謹擇尤酌擬獎敘開單恭呈
御覽仰懇

天恩俯准給獎以示鼓勵其千把等并月行核擬各部備案理合
恭摺具陳伏乞

皇太后

皇上聖鑒訓示謹

奏

截漕收竣片

光緒四年五月二十九日

再前因直隸災區甚廣待賑孔殷欽奉

特恩撥給江蘇漕米十二萬石江北漕米四萬石遵卽就近截留
飭各糧道趕緊交兌並派天津道劉秉琳督同委員迅速驗收轉
發一面酌量各屬災分輕重核定應撥米數催令剋日領運先行
確查戶口以便糧到散放在案茲查江蘇應交正米十二萬石經
剝耗食等米二千五百九十三石八斗江北應交正米四萬石經
剝耗食等米八百六十四石六斗自四月初一日開兌起至二十
五日止江北米石全數兌竣又至五月二十日止江蘇米石全數
兌竣各糧道及在事人員均能仰體

皇仁辦理甚爲妥速並經劉秉琳隨收隨發已發過各屬賑米十
五萬五千二百石餘仍存局候撥調雇官剝民船逐日催督裝運

廷其分區仰算萬里待食堪以仰見

慈廩其解交津貼運費之隨漕輕齎剝價等項另行分咨戶部倉場侍郎查照至晉省賑糧奉撥招商局續辦江廣漕米六萬石又截留江蘇漕米八萬石現均兌收轉運完竣其豫賑項下截留浙江漕米九萬餘石該省委員亦領運過半所有奉撥直晉賑糧漕米收竣分撥轉運各緣由理合附片具陳伏乞

聖鑒謹

奏

暹羅捐賑片

光緒四年五月二十九日

再臣接准前福建撫臣丁日昌咨開晉豫賑捐所有湖廣及香港南洋各埠均經分派員紳前往勸辦茲據暹員李友光稟稱三月初委員陳占鼐陳儀自新嘉坡到暹知爲晉豫連歲荒歉勸捐賑濟經卽稟明暹羅國王並勸諸臣及士庶紳商踴躍捐題該國王捐米五十車值銀二千有餘諸臣共捐銀一千一百餘兩眾士紳及華商等捐銀二萬有餘各將捐款名數列明簿內該項匯單到香港交委員收領轉解助賑等情並據員外郎銜工部主事陳占鼐等稟同前情查李友光本係華人雖久仕在暹尙復繫懷中土陳占鼐陳儀等遠涉重洋極力廣勸均堪嘉尙除俟捐項一律收清凡款屬華商者卽查照新章核給獎敘外暹羅國王此次特捐巨款以爲本國臣庶及寄居華商之倡合計捐款數萬圓日內卽

可收訖尤未便沒其微忱至委員主事陳占鼇訓導陳桂林千總陳儀等認真勸辦現又由暹羅回新嘉坡遂折往越南實屬不辭勞瘁統計新嘉坡暹羅小呂宋檳榔嶼麻六甲等處所題賑捐匯至香港者已有七八萬一俟票期解到陸續匯津該員紳等異出力可否先爲聲明俟事竣從優請獎等因前來臣查暹羅向列外藩夙稱恭順此次助賑情殷不分畛域感

聖主綏懷之德昭遠邦慕義之誠應請由丁日昌就近函謝並傳旨嘉獎該員陳占鼇等往來南洋各島勸捐不遺餘力懋著勤勞可否俟事竣從優請獎恭候

聖裁所有暹羅國王倡率臣庶華商捐集賑款及勸捐委員出力各緣由謹會同前福建巡撫臣丁日昌附片具陳伏乞

聖鑒訓示謹

奏

建設候審所片

光緒四年五月二十九日

再直省幅幘遼闊民氣剛強素多獄訟除前定清訟章程隨時嚴飭各屬依限訊結不准羈累外其案涉疑難情節重大者必須提省審辦以昭慎重惟屍親人證不能不一併提質向來到省後有人承保者卽予取保候審否則發縣看押但審結需時該人證等多非有罪之人日久在押情殊可憫或因窮苦衣食難繼拖斃堪虞自應酌照各省現行章程妥籌矜恤飭據藩臬兩司具詳擬在省城建設候審公所派實任佐官一員住所經理凡提省案證先由保定府訊核大概情形其非本身犯罪或雖係被告情有可矜人地生疏無人承保均交公所收管按日給予飯食病則籌給醫藥一經訊得實情有罪者照例辦理牽連者立卽省釋該所收除人數逐日登記每月開具四柱清冊呈報查考一切經費由外捐

廉應用仍由司道府隨時認真督察務使待質平民得霑實惠不
得稍有剋扣訛索欺陵等弊違則分別參辦除批飭遵照外所有
省城設立候審公所緣由理合附片具陳伏乞

聖鑒敕部知照謹

奏

海防支應請銷摺

光緒四年五月二十九日

奏爲查明天津海防支應局光緒三年分收支餉需按款造冊請銷恭摺仰祈

聖鑒事竊據天津海防支應局司道會詳津郡海防改設練軍並原設海口礮臺通永鎮標大沽協標官兵雲字馬隊應需餉乾等項向在天津海關六成洋稅洋藥釐捐東海關協餉長蘆鹽斤復價甯河釐捐各項下隨時籌撥按照定章撙節支放所有光緒二年分收支款目業經奏咨准銷在案上年三月間因奉省續調直軍馬步鎗隊奏明將天津練軍左營步隊四哨調往連原留一哨合成一營查照練軍出省成案每名月加銀二錢照章每隊添長夫二名營官非本省實缺人員准其用夫四名所需口糧照章各月支銀三兩均自拔隊之日起支至回津紮營之日住支並援照光

緒元年練軍調奉成案每名酌給整裝銀一兩其原留奉省天津
練軍五百九十二員名仍查照練軍出師章程一併分別正餉加
餉按三箇月一次源源接濟至大沽北塘新城等處礮臺續設礮
位照案支給演放經費其餘支發一切款項悉照奏定章程及准
銷成案核給造具細數清冊詳請

奏咨前來臣逐加覆核計自光緒三年正月初一日起截至十二
月三十日止其收款銀三十七萬七千四百十八兩六錢四分五
釐一毫四忽其支款應歸戶部核銷銀三十二萬七百八十九兩
一錢四分九釐五毫一絲二忽三微應歸兵部核銷銀五千三百
五十五兩六錢應歸工部核銷銀五萬三千二百二十兩四錢三
分八釐二毫九絲五忽二微其應銷銀三十七萬九千三百六十
五兩一錢八分七釐八毫七忽五微除本案內扣收過平餘銀五

百三十二兩二錢四釐三毫八絲二忽八微儘數動支外計不敷
墊支銀一千四百十四兩三錢三分八釐三毫二絲七微均係隨
時籌墊並承辦各員請領未發之款俟准部覆再行分別辦理除
清冊咨部查照外所有天津海防收支餉銀造冊請銷緣由理合
恭摺具陳伏乞

皇太后

皇上聖鑒敕部核銷謹

奏

李文忠公奏稿卷三十一